



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
PANELI ZGJEDHOR PËR ANKESA DHE PARASHTRESA  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

**Anr.188/2025**

**PANELI ZGJEDHOR PËR ANKESA DHE PARASHTRESA (PZAP)**, në panelin e përbërë nga gjyqtarët: Ramush Bardiqi kryesues, Kujtim Pasuli dhe Violeta Husaj Rugova anëtarë, duke vendosur përkitazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 27.01.2025, merr këtë:

### VE N D I M

- I. Pranohet e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.188/2025.
- II. Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, i shqiptohet dënimi më gjobë në lartësi prej 4, 000.00 (katërmijë) euro.
- III. Detyrohet Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

### A r s y e t i m

Me datë 24.01.2025, PZAP-i, ka pranuar ankesën e identifikuar me numër Anr.188/2025, të parashtruar nga subjekti politik Lëvizja Vetëvendosje (LVV), me seli në Prishtinë, kundër Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë në të cilën pretendon se më 23 Janar 2025 Qendra e Lëvizjes Vetëvendosje në Suharekë ka identifikuar disa banerë/poster të vendosura në hapësirat publike, të kandidatës për deputete të AAK-së, Albana Bytyçi në rrugën publike “Xhavit Bajraktari”, në Suharekë në afërsi të shtëpisë së kulturës “Ukë Bytyçi”, këta banerë/posterë janë vendosur në shtyllat elektrike dhe ndriçuese të rrugës. Si provë parashtruesi i ankesës ka bashkangjitur një fotografi që dëshmojnë vendosjen e banerëve/postëreve në kundërshtim me LZP.

Më datë 25.01.2025, PZAP-i, e njoftoi Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, për ankesën e paraqitur kundër tyre, duke i dërguar kërkesë për përgjigje deri me 26.01.2025 në ora 12:00.

Në përgjigje në ankesë të paraqitur me datë 26.01.2025, Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, ka theksuar se i kundërshton në tërësi pretendimet ankimore të paraqitura nga LVV, ngase ato janë të pabazuar dhe nuk provojnë inkriminimin e këtij subjekti në shkeljet e pretenduara. Parashtruesi i përgjigjes në ankesë thekson se fillimisht kontestojmë afatshmerinë e ankesës ngase ajo nuk është bërë brenda afatit të paraparë ligjor, dhe se ajo edhe po të ishte e afatshme përsëri do të ishte e pabazuar duke shtuar faktin se gjatë shqyrtimit të kësaj ankesë ato veçse janë larguar dhe se kandidatja për deputete znj. Bytyqi në kohën kur i kishte vendosur posterët kishte vepruar në harmoni me nenin 44, paragrafi.1, nën paragrafi 1.2 i LZP-së si dhe në pajtim me Rregulloren për Fushatën Zgjedhore nr.07/2024, neni 5, paragrafin 1.2 të kësaj rregullore.

Në këtë drejtim, sipas parashtruesit të përgjigjes në ankesë duke vlerësuar që misioni i PZAP është fuqizimi i demokracisë, paanshmëria dhe zgjedhja e kontesteve zgjedhore në kohë për te siguruat të drejtat e të gjithë akterëve ne procesin zgjedhor, atëherë është më se jetike hedhja poshtë e gjitha pretendimeve ankimore të subjektit politik LVV, duke potencuar Nenin 117.3 të LPZ-së i cili përcakton se *“Vendosja për ankesat nga PZAP-ja mbështetet në dëshmi të qarta dhe bindëse”*. Parashtruesi i përgjigjes në ankesë si provë ka bashkangjitur foto dëshmitë nga vendi i ngjarjes.

PZAP-i, pasi që shqyrtoj dhe vlerësoi ankesën gjeti se:

#### **Ankesa është e bazuar**

Paneli pas shikimit të shkresave të lëndës dhe përgjigjes në ankesë të paraqitur nga subjekti politik AAK, vlerësoj se pretendimet e subjektit politik LVV, janë të qëndrueshme dhe si të tilla i aprovoj për faktin se veprimet e përshkruara në ankesat paraqesin shkelje nga ana e Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, gjegjësisht i njëjti subjekt ka vendosur banerët/posterat në rrugë publike të kandidatës për deputete të këtij subjekti politik Albana Bytyqi, në rrugën “Xhavit Bajraktari” në Suharekë, në afërsi të shtëpisë së kulturës “Ukë Bytyqi”, dhe në rrugën “Brigada 123” në Suharekë, ku me këto veprime ka shkelur dispozitat e nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose ne hapësirat private pa lejen e pronareve ose shfrytëzuesve.”*

Paneli shqyrtoi edhe përgjigjen në ankesë të Koalicionit Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, në të cilën e

kundërshton ankesën dhe ku thekson se pretendimet e subjektit politik LVV, janë të pabazuara dhe nuk provojnë inkriminimin e këtij subjekti në shkeljet e pretenduara. Paneli pas vlerësimit të pretendimeve të përgjigjes në ankesë të Koalicionit Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, se i njëjti subjekt ka vepruar në harmoni me nenin 34, par.1 nën par.1.2 i LZP-së dhe në pajtim me Rregulloren për Fushatën Zgjedhore nr.07/2024 dhe ku thekson se hapësira e përmendur në ankesë shfrytëzohet rregullisht për qëllime reklamimi dhe nuk përbën shkelje të dispozitave ligjore të cituara, për Panelin këto pretendime janë të pabazuara dhe të pa argumentuara për faktin se nga përgjigja e ofruar nga Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, nuk ka arritur që ti vërtetoj me asnjë provë dhe dëshmi konkrete thëniet e pretenduar në përgjigjen e saj.

Paneli, me rastin e vendosjes se gjobës si në dispozitiv të këtij vendimi, ka marrë parasysh të gjitha rrethanat si në vijim, fillimisht faktin se në rastin konkret bëhet fjalë për disa shkelje të bëra në të njëjtën kohë, natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se veprimi që përben përsëritje të shkeljes për nga natyra është i njëjtë apo ngjashëm, pjesëmarrjen e subjektit në fjalë në zgjedhjet e mëparshme që konsiston në faktin se Koalicioni Aleanca për Ardhmërinë e Kosovës (AAK), Nisma Socialdemokrate (NISMA), Konservatorët, Intelektualët, me seli në Prishtinë, ka qenë i njoftuar me obligimet dhe përgjegjësit gjatë procesit të fushatës, shkeljet e Ligjeve zgjedhore në fuqi që ka bërë subjekti në fjalë në këto zgjedhje që do të thotë se i njëjti është i njoftuar me rregullat zgjedhore.

Andaj duke u mbështetur në nenin 117.3 të LZP-së ku përcaktohet se: “vendosja për ankesat nga PZAP-ja mbështetet në dëshmi të qarta dhe bindëse”, Paneli vlerësoj se pretendimet e tilla janë të qëndrueshme dhe si të tilla i pranoi, sepse kjo shkelje ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi si të bazuar.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1 dhe neni 120 paragrafi 1 nën paragrafi 1.3 të LZP-së, të LZP-së, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtresa  
Anr.188/2025 më datën 27.01.2025



**Këshilla Juridike:** Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimit të këtij vendimi.